

Hotel de Nantes

1842

1842

938  
ARTICLES

PARTICVLIER, S,

EXTRAICTS DES GENERAUX,

Quele Roy a accordez à ceux de la Religion pretendue reformee : Lesquels sa Majesté n'a voulu estre comprins esdits generaux, ny en l'Edict qui a esté fait & dressé sur iceux donné à Nantes au mois d'Auril 1598. & neantmoins a accordé sadite Majesté qu'ils seront entierement accomplis & obseruez, tout ainsi que le contenu audit Edict.



A PARIS,

Chez F. E. D. MOREL, & P. METTAYER,  
Imprimeurs ordinaires du Roy.

M. DCXXII.

*Avec Privilège de sa Majesté.*

Case

F

39

326

1622 fm

THE NEWBERRY  
LIBRARY



**ARTICLES PARTICVLIERS,**  
*Extraictz des Generaux, Que le Roy a accordez  
 à ceux de la Religion pretendue reformee : Les-  
 quels sa Maiesté n'a voulu estre comprins esdits  
 generaux, ny en l'Edict qui a esté fait & dressé  
 sur iceux donné à Nantes au mois d'Auril der-  
 nier, & neantmoins a accordé sadite Maiesté  
 qu'ils seront entierement accomplis & observez,  
 tout ainsi que le contenu audit Edict : Et à ces  
 fins seront registreZ en ses Cours de Parlement  
 & ailleurs où besoin sera, & toutes Declarations  
 Promissions & Lettres necessaires en seront expé-  
 diées.*

**ARTICLE PREMIER.**



**A**RTICLE sixiesme dudit Edict,  
 touchant la liberté de conscien-  
 ce, & permission à tous les sujets  
 de sa Majesté, de viure & demeu-  
 rer en ce Royaume & pais de son  
 obeïssance, aura lieu & sera ob-  
 servé selon la forme & teneur,

Mesmes pour les Ministres, Pedagogues, que tous  
 autres qui sont ou seront de ladite Religion soient  
 regnicoles ou autres, en se comportans au reste, se-  
 lon qu'il est porté par ledit Edict.



## II.

Ne pourront estre ceux de ladite Religion contraincts de contribuer aux reparations & constructions des Eglises, Chapelles & Presbytaires, ny à l'achapt des ornemens Sacerdotaux, luminaires, fontes de Cloches, Pain benist, droicts de Confrairies, loziages de maisons pour la demeure des Prestres & Religieux, & autres choses semblables, sinon qu'ils y fussent obligez par fondations, dotations ou autres dispositions faictes par eux ou leurs auteurs & predecesseurs.

## III.

Ne seront aussi contraincts de rendre & parer le deuant de leurs maisons aux iours de Festes ordonnez pour ce faire; mais seulement souffrir qu'il soit réduit & paré par l'autorité des Officiers des lieux, sans que ceux de ladite Religion contribuent aucune chose pour ce regard.

## IV.

Ne seront pareillement tenus ceux de ladite Religion de recevoir exhortation, lors qu'ils seront malades ou prochains de la mort, soit par condamnation de Iustice ou autrement, d'autres, que de la mesme Religion, & pourront estre visitez & consolez de leurs Ministres, sans y estre troublez, & quand à ceux qui seront condamnez par Iustice, lesdits Ministres les pourront pareillement visiter & consoler sans faire prieres en publicq, sinon es lieux où ledit exercice public leur est permis par ledit Edict.

## V.

Sera loisible à ceux de ladite Religion de faire

l'exercice public d'icelle à Pimpoul. Et pour Dieppe au Faux-bourg du Paulet, & seront lesdits lieux de Pimpoul & du Paulet ordonnez pour lieux de bailliages. Quand à Sancerre, sera ledit exercice continué, comme il est à present, sauf à l'establis dans ladite ville, faisant apparoir par les habitans du consentement du Seigneur du lieu, à quoy leur sera pourueu par les Commissaires que sa Majesté deputera pour l'exécution de l'Edict. Sera aussi ledit exercice libre & public, restably dans la ville de Montagnat en Languedoc.

VI.

Sur l'article faisant mention des Bailliages, a esté declaré & accordé ce qui s'ensuit. Premièrement, pour l'establissement de l'exercice de ladite Religion és deux lieux accordez en chacun Bailliage, Seneschauſſee & Gouuernemét, Ceux de ladite Religion nommeront deux villes, és Faux-bourgs desquelles ledit exercice sera estably par les Commissaires que sa Majesté deputera pour l'exécution de l'Edict, & où il ne seroit iugé à propos par eux, nommeront ceux de ladite Religion deux ou trois bourgs ou villages proches desdites villes, & pour chacune d'icelles, dont lesdits Commissaires en choisiront l'un: & si par hostilité, contagion ou autre legitime empeschement, il ne peut estre continué esdits lieux, leur en seront baillez d'autres pour le temps que durera ledit empeschement. Secondement, qu'au Gouuernement de Picardie, ne sera pourueu que de deux villes, aux Fauxbourgs desquelles ceux de ladite Religion pourront auoir l'exercice d'icelle pour tous les Bailliages, Senes-

chauffees & Gouvernemens qui en dependent : & où il ne seroit iugé à propos de l'establir esdites villes, leur serôt baillez deux bourgs ou villages commodes. Tiercement, pour la grande estendue de la Seneschauſſee de Prouence & Bailliage de Viennois, sa Majesté accorde en chacun desdits Bailliages & Seneschauſſees, vn troisieme lieu, dont le choix & nomination se fera comme dessus, pour y establir l'exercice de ladite Religion, outre les autres lieux où il est desja estably.

#### VII.

Ce qui est accordé par ledit article pour l'exercice de ladite Religion és Bailliages, aura lieu pour les terres qui appartenoiét à la feüe Royne belle-mere de sa Majesté, & pour le Bailliage de Beaujolois.

#### VIII.

Outre les deux lieux accordez pour l'exercice de ladite Religion, par les articles particuliers de l'an 1577. és Isles de Marennes & Doleron, leur en seront donnez deux autres, à la commodité desdits habitans : ſçauoir vn pour toutes les Isles de Marennes, & vn autre pour l'Isle d'Oleron.

#### IX.

Les prouiſions octroyees par sa Majesté pour l'exercice de ladite Religion en la ville de Mets, sortiront leur plein & entier effect.

#### X.

Sa Majesté veut & entend, que l'article 27. de son Edict, touchant l'admission de ceux de ladite Religion pretendue reformee aux offices & dignitez, soit obserué & entretenu selon sa forme & teneur, Nonobstant les Edicts & accords cy-



deuant faicts pour la reduction d'aucuns Princes, Seigneurs, Gentils-hommes & villes Catholiques en son obeïssance, lesquels n'autont lieu au preiudice de ceux de ladite Religion qu'en ce qui regarde l'exercice d'icelle: & fera ledit exercice réglé, selon & ainsi qu'il est porté par les articles qui s'ensuiuent, suiuant lesquels seront dressées les instructions des Commissaires que sa Majesté deputera pour l'exécution de son Edict, selon qu'il est porté par iceluy.

#### XI.

Suiuant l'Edict faict par sa Majesté pour la reduction du sieur Duc de Guyse, l'exercice de ladite religion pretendue reformee, ne pourra estre fait ny estably dans les villes & faux-bourgs de Rheims, Rocroy, Saint Disier, Guyse, Joinuille, Fismes, & Montcornet és Ardennes.

#### XII.

Ne pourra aussi estre fait és autres lieux és enuiron desdites villes & places defendues par l'Edict de l'an 1577.

#### XIII.

Et pour oster toute ambiguité qui pourroit naistre sur le mor, és enuiron, declare sa Majesté auoir entendu parler des lieux qui sont dans la banlieuë desdites villes, esquels lieux l'exercice de ladite Religion ne pourra estre estably, sinon qu'il y fust permis par l'Edict de 77.

#### XIV.

Et d'autant que par iceluy ledit exercice estoit permis generalement és fiefs possédez par ceux de ladite Religion, sans que ladite banlieuë en fut ex-

ceptee, declare sadite Majesté, que la mesme permission aura lieu, mesme és fiefs qui seront dedans icelle tenus par ceux de ladite Religion, ainsi qu'il est porté par son Edict donné à Nantes.

## XV.

Suiuant aussi l'Edict fait pour la reductiō du sieur Marechal de la Chastre, en chacun des Bailliages d'Orleans & Bourges, ne sera ordonné qu'un lieu de Bailliage pour l'exercice de ladite Religion, lequel neantmoins pourra estre continué és lieux où il leur est permis de la continuer par ledit Edict de Nantes.

## XVI.

La concession de prescher és fiefs aura pareillement lieu dans lesdits Bailliages en la forme portée par ledit Edict de Nantes.

## XVII.

Sera pareillement obserué l'Edict fait pour la reduction du sieur Marechal de Bois-Dauphin, & ne pourra ledit exercice estre fait és villes, faux-bourgs & places amenees par luy au seruice de sa Majesté, & quand aux enuironz ou banlieuë d'icelle y sera l'Edict de 77. obserué, mesmes és maisons de fiefs, ainsi qu'il est porté par ledit Edict de Nantes.

## XVIII.

Ne se fera aucun exercice de ladite Religion és villes, fauxbourgs & Chasteau de Morlays, suiuant l'Edict fait sur la reduction de ladite ville, & sera l'Edict de 77, obserué au ressort d'icelle, mesmes pour les fiefs, selon l'Edict de Nantes.

## XIX.

En consequence de l'Edict pour la reduction de  
Quimper-

Quimpercorentin, Ne sera fait aucun exercice de ladite Religion en tout l'Euesché de Cornouaille.

XX.

Suiuant aussi l'Edict faict pour la reduction de Beauuais, l'exercice de ladite Religion ne pourra estre fait en ladite ville de Beauuais, ny trois lieuës à la ronde. Pourra neantmoins estre fait & estably au surplus de l'estenduë du Bailliage aux lieux permis par l'Edict de 77. mesmes és maisons des siefs ainsi qu'il est porté par ledit Edict de Nantes.

XXI.

Et d'autant que l'Edict fait pour la reduction du feu sieur Admiral de Villars, n'est que prouisionnel & iusqu'à ce que par le Roy en eut autrement esté ordonné, sa Majesté veut & entend, que nonobstant iceluy, son Edict de Nantes ait lieu pour les villes & ressorts amenez à son obeïssance par lesdits sieur Admiral, comme pour les autres lieux de son Royaume.

XXII.

En suite de l'Edict fait pour la reduction du sieur Duc de Ioyeuse, l'exercice de ladite Religion ne pourra estre fait en la ville de Tholose, Fauxbourgs d'icelle, & quatre lieuës à la ronde, ny plus près que sont les villes de Villemur, Carman & l'Isle en Tourdan.

XXIII.

Ne pourra aussi estre remis és villes Dalet, Fiac, Auriac, & Montesquiou, à la charge toutesfois, que si ausdites villes, aucuns de ladite Religion faisoïent instance d'auoir vn lieu pour l'exercice d'icelle, leur sera par les Commissaires que sa Majesté deputera

pour l'exécution de son Edict, ou par les Officiers des lieux assigné pour chacune desdites villes, lieu commode & de leur accez qui ne sera esloigné desdites villes de plus d'une lieuë.

## XXIV.

Pourra ledit exercice estre estably, selon & ainsi qu'il est porté par ledit Edict de Nantes, au ressort de la Cour de Parlement de Tholose, excepté toutesfois és Bailliages, Seneschauſſees & leurs ressorts dont le siege principal a esté ramené à l'obeissance du Roy par ledit sieur Duc de Joyeuse, auquel l'Edict de 77. aura lieu: entend toutesfois sadite Majesté, que ledit exercice puisse estre continué és endroits desdits Bailliages & Seneschauſſees, où il estoit du temps de ladite réduction & que la Concession d'iceluy és maisons des fiefs, ait lieu dans iceux Bailliages & Seneschauſſees, selon qu'il est porté par ledit Edict.

## XXV.

L'Edict fait pour la réduction de la ville de Dijon sera observé, & suivant iceluy, n'y aura autre exercice de Religion, que de Catholique Apostolique & Romaine en ladite ville & Fauxbourgs d'icelle, ny quatre lieuës à la ronde.

## XXVI.

Sera pareillement observé l'Edict fait pour la réduction du sieur Duc de Mayenne, suivant lequel ne pourra l'exercice de ladite Religion pretendue reformee, estre fait és villes de Chaalon, Seure, & Soissons, Bailliages dudit Chaalon, & deux lieuës és environs de Soissons, durant le temps de six ans à commencer au mois de Januier an 1596. passé le-



quel temps y sera l'Edict de Nantes obserué, comme aux autres endroits de ce Royaume.

## XXVII.

Sera permis à ceux de ladite Religion de quelque qualité qu'ils soient d'habiter, aller & venir librement en la ville de Lyon & aux autres villes & places du Gouvernement de Lyonnois, nonobstant toutes defenses faites au contraires par les Scindics & Escheuins de ladite ville de Lyon, & confirmées par sa Majesté.

## XXVIII.

Ne sera ordonné qu'un lieu de Bailliage pour l'exercice de ladite Religion en toute la Seneschauſſee de Poictiers, outre ceux où il est à present estably, & qu'ad aux fiefs sera ſuiuy l'Edict de Nantes. Sera auſſi ledit exercice continué dans la ville de Chauuigny: Ne pourra ledit exercice estre restably dans les villes Dagen, & Perigueux, encores que par l'Edict de 77. il y peut estre.

## XXIX.

N'y aura que deux lieux de Bailliages pour l'exercice de ladite Religion en tout le Gouvernement de Picardie, cōme il a esté dit cy dessus, & ne pourront lesdits deux lieux estre donnez dans les ressorts des Bailliages & Gouvernemens reſeruez par les Edicts faits sur la reduction d'Amyens, Peronne, & Abbeuille: Pourra toutesfois ledit exercice estre fait és maisons de fiefs, par tout le Gouvernement de Picardie, selon & ainſi qu'il est porté par ledit Edict de Nantes.

## XXX.

Ne sera fait aucun exercice de ladite Religion.



en la ville & Fauxbourgs de Sens, & ne sera ordonné qu'un lieu de Bailliage pour ledit exercice en tout le ressort du Bailliage, sans preiudice toutes-fois de la permission accordée pour les maisons de fiefs, laquelle aura lieu selon l'Edict de Nantes.

## XXXI.

Ne pourra semblablement estre fait ledit exercice en la ville & Faux-bourgs de Nantes, & ne sera ordonné aucun lieu de Bailliage pour ledit exercice à trois lieues à la ronde de ladite ville, pourra toutesfois estre fait es maisons de fiefs suivant ce-luy Edict de Nantes.

## XXXII.

Veut & entend sadite Majesté que sondit Edict de Nantes soit obserué des à present, en ce qui concerne l'exercice de ladite Religion, es lieux où par les Edicts & accords faits pour la reduction d'aucuns Princes, Seigneurs, Gentils-hommes & villes Catholiques, il estoit inhibé par prouision tant seulement & iusques à ce qu'autrement fut ordonné, Et quand à ceux où ladite prohibition est limitée à certain temps, passé ledit temps, elle n'aura plus de lieu.

## XXXIII.

Sera baillé à ceux de ladite Religion un lieu pour la ville, Preuosté & Vicomté de Paris, à cinq lieues pour le plus de ladite ville, auquel ils pourront faire l'exercice public d'icelle.

## XXXIV.

En tous les lieux où l'exercice de ladite Religion se fera publiquemēt, on pourra assembler le peuple, mesme à son de cloches, & faire tous actes & fon-

Etions appartenans tant à l'exercice de ladite Religion, qu'au reglement de la discipline, comme tenir Consistoires, Colloques, & Synodes Prouvinciaux & nationnaux par la permission de sa Majesté.

### XXXV.

Les Ministres anciens & Diacres de ladite Religion ne pourront estre contrains de respondre en Iustice en qualité de tesmoins pour les choses qui auront esté reuelees en leurs Consistoires, lors qu'il s'agit de censures, sinon que ce fut pour chose concernant la personne du Roy, ou la conseruation de son Estat.

### XXXVI.

Sera loisible à ceux de ladite Religion qui demeurent és champs, d'aller à l'exercice d'icelles és villes & faux-bourgs & autres lieux où il sera publiquement estably.

### XXXVII.

Ne pourront ceux de ladite Religion tenir escholes publiques, sinon és villes & lieux où l'exercice public d'icelle leur est permis, & les prouisions qui leur ont esté cy deuant accordees pour l'erection & entretenement des Colleges, seront verifiees où besoin sera, & sortiront leur plain & entier effect.

### XXXVIII.

Sera loisible aux peres faisans profession de ladite Religion de pouruoir à leurs enfans de tels educateurs que bon leur semblera, & en substituer vn ou plusieurs par testament, codicille ou autre declaration passée par deuant Notaires, ou escriite & si-

gnée de leurs mains, demeurans les loix receües en ce Royaume, ordonnances & coustumes des lieux en leur force & vertu pour les dations & provisions de tuteurs & curateurs.

### XXXIX.

Pour le regard des mariages des Prestres & personnes Religieuses qui ont esté cy deuant contractez, sadite Majesté ne veut ny entéd pour plusieurs bonnes considerations, qu'ils en soient recherchez ny molestez, & sera sur ce imposé silence à ses Procureurs generaux, & autres officiers d'icelle. Declare neantmoins sadite Majesté qu'elle entend que les enfans yssus desdits mariages pourront succeder seulement és meubles, acquests & conquests immeubles de leurs peres & meres, & au defaut desdits enfans, les parens plus proches & habiles à succeder, & les testamens, donations & autres dispositions faites ou à faire par personnes de ladite qualité, desdits biens, meubles, acquests, & conquests immeubles, sont declarees bonnes & valables: Ne veut toutesfois sadite Majesté que lesdits Religieux & Religieuses profez, puissent venir à aucune succession directe ny collaterale, ains seulement pourront prendre les biens qui leur ont esté ou seront laissez par testaments, donations, ou autres dispositions, excepté toutesfois ceux desdites successions directes & collaterales, & quand à ceux qui auront fait profession avant l'age porté par les ordonnances d'Orleans & Blois, sera suiuite & obseruee en ce qui regarde lesdites successions, la teneur desdites ordonnances, chacune pour le temps qu'elles ont eu lieu.

Sadite Majesté ne veut aussi que ceux de ladite Religion, qui auront cy deuant contracté ou contracteront cy apres mariages au tiers & quart degré en puissent estre molestez, ny la validité desdits mariages reuoquee en doute, ne pareillement la succession ostee ny querelee aux enfans, naiz ou à naistre d'iceux: & quand aux mariages qui pourroient estre ja contractez en second degré ou du second au tiers entre ceux de ladite Religion, se retirans deuers sadite Majesté, ceux qui seront de ladite qualité & auront contracté mariage en tel degré, leur seront baillees telles prouisions qui leur seront necessaires, afin qu'ils n'en soient recherchez ny molestez, ny la succession querelee ny debatue à leurs enfans.

XLI.

Pour iuger de la validité des mariages faits & contractez par ceux de ladite Religion & decider s'ils sont licites, si celui de ladite Religion est defendeur, en ce cas le Iuge Royal cognoistra du fait dudict mariage, & où il seroit demandeur & le defendeur Catholique, la cognoissance en appartiendra à l'Official & Iuge Ecclesiastique, & si les deux parties sont de ladite Religion, la cognoissance en appartiendra aux Iuges Royaux: voulant sadite Majesté que pour le regard desdits mariages & differends qui suruiendront pour iceux, les Iuges Ecclesiastiques & Royaux, ensemble les Chambres establies par son Edict, en cognoissent respectiuement.

XLII.

Les donations & legats faits & à faire, soit par



disposition de dernière volonté à cause de mort, ou entre vifs, pour l'entretienement des Ministres, Docteurs, escholiers & pauvres de ladite Religion pretendue reformee, & autres causes pies, seront valables, & sortiront leur plain & entier effect, nonobstant tous Iugemens, Arrests & autres choses, à ce contraires, sans preiudice toutesfois des droicts de sa Majesté & l'autrui, en cas que lesdits legats & donations tombent en main morte: & pourrôt toutes actions & poursuites necessaires pour la iouissance desdits legats, causes pies, & autres droits, tant en iugement que dehors, estre faites par Procureur sous le nom du corps & communauté de ceux de ladite Religion qui aura interest, & s'il se trouue qu'il ait esté cy deuant disposé desdites donations & legats autrement qu'il n'est porté par ledit article, ne s'en pourra pretendre aucune restitution que sur ce qui se trouuera en nature.

### XLIII.

Permet sadite Majesté à ceux de ladite Religion eux assembler pardeuant le Iuge Royal & par son autorité egaler & leuer sur eux telle somme de deniers qu'il sera arbitré estre necessaire pour estre employez pour les fraiz de leurs Synodes & entretenemens de ceux qui ont charges pour l'exercice de leur dite Religion, dont on baillera l'estat audit Iuge Royal, pour iceluy garder, la coppie duquel estat sera enuoyee par ledit Iuge Royal de six en six mois à sadite Majesté ou à son Chancelier, & seront les taxes & impositions desdits deniers executoires, nonobstant oppositions ou appellations quellsconques.

### XLIV.



## XLIV.

Les Ministres de ladite Religion seront exempts des gardes & rondes, & logis de gens de guerre, & autres assiettes & cueillettes de Tailles, ensemble des tutelles, curatelles & commissions pour la garde des biens saisis par autorité de Justice.

## XLV.

Pour les enterremens de ceux de ladite religion, faits par cy deuant aux Cimetieres desdits Catholiques, en quelque lieu ou ville que ce soit, n'entend ladite Majesté, qu'il en soit fait aucune recherche innouation ou poursuite, & sera enjoint à ses Officiers d'y tenir la main. Pour le regard de la ville de Paris, outre les deux Cimetieres que ceux de ladite Religion y ont presentement: à sçauoir celuy de la Trinité & celuy de saint-Germain, leur sera baillé vn troisieme lieu commode pour lesdites sepultures aux Faux-bourgs saint Honoré ou saint Denys.

## XLVI.

Les Presidens & Conseillers Catholiques qui seruiron en la chambre ordonnee au Parlement de Paris, seront choisis par sa Majesté sur le tableau des officiers dudit Parlement.

## XLVII.

Les Conseillers de ladite Religion pretendue reformee qui seruiron en ladite chambre assisteront si bon leur semble és procez qui se vuideront par Commissaires, & y auront voix deliberatiue, sans qu'ils ayent part aux deniers conaignez, sinon lors que par l'ordre & prerogatiue de leur reception, ils y deuront assister.

## XLVIII.

Le plus ancien President des chambres my-parties, presidera en l'audience & en son absence le second, & se fera la distribution des procez par les deux Presidents conioinctement ou alternatiuement par mois ou par sepmaine.

## XLIX.

Aduenant vacation des offices dont ceux de ladite Religion sont ou seront pourueuz ausdites chambres de l'Edict y sera pourueu de personnes capables, qui auront attestation du Synode ou Colloque dont ils seront, qu'ils sont de ladite Religion & gens de bien.

## L.

L'abolition accordée à ceux de ladite Religion pretendue reformee par le 74. article dudit Edict aura lieu pour la prise de tous deniers Royaux, soit par ruptures de coffres ou autrement, mesmes pour le regard de ceux qui se leuoient sur la riuere de Charente, Ores qu'ils eussent esté affectez & assignez à des particuliers.

## LI.

L'article 46. des articles secrets faits en l'annee 1577. touchant la ville & Archeuesché d'Auignon & Comté de Venisse, ensemble le traicté fait à Nismes, seront obseruez selon leur forme & teneur, & ne seront aucunes lettres de marque en vertu desdits articles & traitez, donnees que par lettres patentes du Roy scelees de son grand seau. Pourront neâtmoins ceux qui les voudrôt obtenir se pouruoir en vertu du present article, & sans autre cōmission, par deuant les Iuges Royaux, lesquels informeront

des contrauentions, deny de Iustice, & iniquité des iugemens, proposee par ceux qui desireront obtenir lescdites lettres, & les enuoiront avec leur aduis clos & scellés à sa Majesté pour en estre ordonné comme elle verra estre à faire par raison.

## LII.

Sa Majesté accorde & veut que maistre Nicolas Grimoul, soit restably & maintenu au tiltre & possession des offices de Lieutenant General Ciuil ancien, & de Lieutenant General Criminel, au Bailliage d'Alençon, nonobstant la resignation par luy faite à maistre Iean Marguerit, reception d'iceluy, & la prouision obtenue par maistre Guillaume Bernard de l'Office de Lieutenant General Ciuil & Criminel au siege d'Exmes, & les Arrests donnez contre ledit Marguerit resignataire durant les troubles au Conseil priué és années 1586. 1587. & 1588. par lesquels maistres Nicolas Barbier est maintenu és droicts & prerogatiues de Lieutenant General ancien audit Bailliage, & ledit Bernard audit office de Lieutenant à Exmes, lesquels sa Majesté a cassez & annullez & tous autres à ce cōtraires: Et outre sadite Majesté pour certaines bonnes considerations a accordé & ordonné que ledit Grimoult remboursera dedans trois mois ledit Barbier de la finance qu'il a fournie aux parties casuelles pour l'Office de Lieutenant General Ciuil & Criminel en la Vicomté d'Alençon, & de cinquante escus pour les frais: commettant à ceste fin le Bailly du Perche ou son Lieutenant à Mortagne. Et le remboursement fait, ou bien que ledit Barbier soit refusant ou dilayant de le receuoir, sadite Ma-

jesté a defendu audit Barbier, cōme aussi audit Bernard apres la signification du present article, de plus s'ingerer en l'exercice desdits Offices, à peine de crime de faux, & enuoye iceluy Grimoult en la iouissance d'iceux Offices & droitz y appartenans, & en ce faisant les procez qui estoient pendans au Conseil priué de sa Majesté, entre lesdits Grimoult, Barbier & Bernard demeureront terminez & assoupis, defendant sadite Majesté aux Parlemens & tous autres d'en prendre cognoissance, & ausdites parties d'en faire poursuite. En outre sadite Majesté s'est chargée de rembourser ledit Bernard de mil escus fournis aux parties casuelles pour iceluy Office, & de soixante escus pour le marc d'or & frais: ayant pour cet effect presentement ordonné bonne & suffisante assignation, le recouurement de laquelle se fera à la diligence & frais dudit Grimoult.

#### LIII.

Sadite Majesté escriira à ses Ambassadeurs de faire instance & poursuite pour tous les sujets, mesmes de ceux de ladite Religion pretendue reformee, à ce qu'ils ne soient recherchez en leurs consciences, ny sujets à l'Inquisition, allans, venans, sejourrans, negotians & traficquans par tous les pays estrangers alliez & confederez de ceste couronne, pourueu qu'ils n'offensent la police des païs où ils seront.

#### LIV.

Ne veut sa Majesté qu'il soit fait aucune recherche de la perception des impositions qui ont esté leuees à Royan, en vertu du cōtract fait avec le sieur



de Candeley, & autres faites en continuation d'iceluy, vallidant & approuuant ledit contract pour le temps qu'il a eu lieu en tout son contenu, iusques au dixhuietiésme iour de May prochain.

## L V.

Les excez aduenus en la personne d'Armand Courtines dans la ville de Millant en l'an 1587. & de Iean Reynes & Pierre Seigneuret, ensemble les procedures faites contre eux par les Consuls dudit Millant, demeurét abolies & assoupies par le benefice de l'Edict, sans qu'il soit loisible à leurs vesues & heritiers, ny aux Procureurs generaux de sa Majesté, leurs substituts ou autres personnes quelsconques d'en faire mention, recherche, ny poursuite, nonobstant & sans auoir regard à l'Arrest donné en la Chambre de Castres le dixiesme iour de Mars dernier, lequel demeurera nul & sans effect, ensemble toutes informations & procedures faites de part & d'autre.

## LVI.


Toutes pour suites, procedures, Sentences, Iugemens & Arrests, donnez tant contre le feu sieur de la Nouë, que contre le sieur Odet de la Nouë son fils depuis leurs detentions & prisons en Flandres aduenüés és mois de May 1580. & de Novembre 1584. & pendant leur continuelle occupation au fait des guerres & seruice de sa Majesté demeureront cassez & annullez, & tout ce qui est ensuiuy en consequence d'iceux, & seront lesdits de la Nouë receus en leurs defenses, & remis en tel estat qu'ils estoient auparauant lesdits Iugemens & Arrests, sans qu'ils soient tenus refonder les despens



ny conſigner les amendes, ſi aucunes ils auoient encouru, ny qu'on puiſſe alleguer contre eux aucune peremption d'instance ou preſcription pendant ledit temps.

Fait Par le Roy eſtant en ſon Conſeil à Nantes, le deuxieſme iour de May mil cinq cens quatre vingts dixhuiſt. Signé, H E N R Y. Et plus bas, FORGET. Et ſcellees du grand ſeau de cire iaune.

---

 E N R Y par la grace de Dieu, Roy de France & de Nauarre, A nos amez & ſeaux les genſtenans noſtre Cour de Parlement à Paris, Salut. Nous auons au mois d'Auril dernier, faiſt expedier nos lettres d'Edict pour l'eſtabliſſement d'un bon ordre & repos entre nos ſubjects Catholiques & ceux de ladite Religion pretendue reformee: Et outre ce nous auons accordé auſdits de ladite Religion, certains articles ſecrets & particuliers, que nous voulons auoir pareille force & vertu, & eſtre obſeruez & accomplis tout ainſi que noſtre dit Edict. A ces cauſes, Nous voulons, vous mandons, & tres-expreſſément commandons par ces preſentes, que leſdits articles ſignez de noſtre main, cy attachez ſouz le contre-ſeal de noſtre Chancellerie, vous faiſtes regiftrer és regiftrés de noſtre dite Cour, & le contenu en iceux garder, entretenir, & obſeruer de point en point, tout de meſme que celui de noſtre dit Edict: Ceſſans & faiſant ceſſer tous troubles & empeschemens au contraire. Car tel eſt noſtre

plaisir. Donné à Nantes le deuxiesme iour de May, l'an de grace mil cinq cens nonante huiet. Et de nostre regne le neufiesme. Signé, Par le Roy, Forget. Et scellé sur simple queue de cire iaulne.

---

### *Sommaire du Priuilege.*

**P**AR Lettres patentes du Roy, donnees à Paris le vingt-deuxiesme iour de Feurier, mil six cens vingt, signées, LOVIS, & sur le reply, Par le Roy, DE LOMENIE, & scellees du grand scel dudit Seigneur, en cire iaulne, sur double queue: verifiees, tant en la Cour de Parlement, Chambre des Comptes, Cour des Aydes, Chastelet de Paris, qu'au Bailliage du Palais: Il est permis à Federic Morel, & Pierre Mettayer ses Imprimeurs ordinaires, d'imprimer, ou faire imprimer, vendre & debiter tous Edicts, Ordonnances, Mandemens, Lettres patentes, comme aussi tous Arrests, tant de son Conseil, que de ses Cours, sans qu'autres Libraires & Imprimeurs les puissent imprimer ne faire imprimer, vendre ne distribuer, en quelque sorte & maniere que ce soit, sur peine de cinq cens liures d'amende. Voulant au surplus, que tout ce qui se trouuera imprimé de ce que dessus, par autres que lesdits Morel & Mettayer, soit saisi & cancelé comme nul & faulx, & faict contre son auctorité & commandement.

1877 - 1878  
The first year of the  
new year of the  
new year of the  
new year of the

new year of the  
new year of the  
new year of the

new year of the  
new year of the  
new year of the

new year of the  
new year of the  
new year of the

new year of the  
new year of the  
new year of the

new year of the  
new year of the  
new year of the

new year of the  
new year of the  
new year of the

new year of the  
new year of the  
new year of the

new year of the  
new year of the  
new year of the

